

SIPA nije uspjela privedi svjedoke u predmetu protiv Dacića

Danas nije održano ročište koje se na Sudu Bosne i Hercegovine (BiH) vodi protiv Hamde Dacića, Harisa Zornića i Acika Cana, optuženih za trgovinu drogom i pranje novca, jer ponovo nisu došli svjedoci odbrane. Ročišta se iz istog razloga odgađaju već nekoliko puta. Nije pomogao niti nalog kojim je Sud BiH prije sedam dana zadužio Državnu agenciju za istrage i zaštitu (SIPA) da privede svjedoka Savetu Zvizdić te još jednog zaštićenog svjedoka.

Predsjedavajući Sudskog vijeća Mirsad Strika je kazao da je SIPA obavijestila Sud BiH da nije mogla pronaći zaštićenog svjedoka koji se, prema njihovoj evidenciji, i ne nalazi u Sarajevu. Centar za istraživačko novinarstvo iz Sarajeva (CIN) doznaje od službenika Suda da se razlog neprivođenja Zvizdićke još uvijek ne zna i da se u vezi sa tim čeka službeni odgovor od SIPA-e.

CIN je već pisao kako se Zvizdić ranije obratila Sudu, izjavom da ne želi svjedočiti u ovom procesu, jer nema šta da kaže. Danas se trebao pojaviti i svjedok Jurgen Hofman, biznismen iz Njemačke. On je, međutim, Sudu poslao dopis u kojem je kazao da je bio spriječen doći na Sud zato što nije mogao kupiti kartu za Sarajevo, navodno, zbog štrajka radnika njemačke avionske kompanije Lufthanse. Kako prenose mediji, štrajk je počeo prošle sedmice i otkazani su mnogi letovi iz Njemačke.

Prema riječima Vlade Adamovića, advokata koji zastupa Zornića, Nijemac Hofman bi trebao govoriti o poslovnim uspjesima njegovog klijenta i optuženog Dacića u Njemačkoj, jer je usko sarađivao s njima. Advokat očekuje da će svjedočenje ovog Nijemca dovesti u sumnju tvrdnje Tužilaštva o načinu zarade

novca za koji tužioci tvrde da je stečen prodajom droge.

Danas se na ročištu pojavio i Dragan Barbarić, branilac Hamde Dacića kojem je Sud BiH poslao poziv jer se već izvjesno vrijeme nije pojavljivao na ročištima za koja je dobio naknadu kao advokat po službenoj dužnosti, a na kojim ga je mijenjao advokat Adamović.

Sljedeće ročište je zakazano za 18. septembar, kada bi trebali biti saslušani svjedoci odbrane Hamdo Murić i Ismet Bektić, koji su ranije pozivani, ali nisu svjedočili.

Tužilaštvo BiH je optužilo Dacića, Zornića i Cana te pravno lice Majorku iz Sarajeva da su trgovanjem droge zaradili između pet i šest miliona maraka, a novac „oprani“ preko Hotela Exclusive. Optužnica je podignuta 16. novembra 2009. godine a suđenje je počelo 21. februara 2010. godine.

Objavljeno: 11.9.2012. godine